

Na osnovu člana 66. stav 2. Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05) i člana 10. Zakona o podsticajima za zapošljavanje i intervencijama u privrednim subjektima („Službene novine Tuzlanskog kantona“, broj: 8/14), Ministarstvo razvoja i poduzetništva, donosi:

U P U T S T V O

O NAČINU PRIKUPLJANJA SREDSTAVA ZA PODSTICAJE U ZAPOŠLJAVANJU

I PREDMET UPUTSTVA

Član 1. **(Predmet Uputstva)**

Ovim Uputstvom utvrđuje se način prikupljanja sredstava za podsticaje u zapošljavanju na području Tuzlanskog kantona (u daljem tekstu: Kanton) koja se obezbjeđuju u skladu sa Zakonom o podsticajima u zapošljavanju i intervencijama u privrednim subjektima („Službene novine Tuzlanskog kantona“, broj: 8/14).

II SREDSTVA ZA PODSTICAJE U ZAPOŠLJAVANJU

Član 2. **(Sredstva za podsticaje u zapošljavanju)**

(1) Sredstva za podsticaje u zapošljavanju na području Kantona (u daljem tekstu: sredstva za podsticaje u zapošljavanju) obezbjeđuju se iz donacija zaposlenih čiji poslodavci imaju sjedište na području Tuzlanskog kantona (u daljem tekstu: zaposleni), te donacija drugih domaćih i stranih pravnih i fizičkih lica i drugih izvora.

(2) Sredstva za podsticaje u zapošljavanju prikupljaju se na posebnom podračunu u okviru Jedinog računa trezora na poziciji Ministarstva razvoja i poduzetništva Tuzlanskog kantona (u daljem tekstu: Ministarstvo), kao namjenska sredstva.

III NAČIN PRIKUPLJANJA SREDSTAVA ZA PODSTICAJE U ZAPOŠLJAVANJU

Član 3. **(Javni poziv)**

Sredstva za podsticaje u zapošljavanju će se prikupljati na osnovu javnog poziva koji Ministarstvo objavljuje u najmanje jednom dnevnom listu koji se distribuira na području Kantona, kao i na web stranici Ministarstva i Vlade Tuzlanskog kantona (u daljem tekstu: Vlada) i dostavlja svim poslodavcima čije je sjedište na području Kantona (u daljem tekstu: poslodavci).

Član 4.

(Način na koji se vrši uplata sredstava za podsticaje u zapošljavanju)

(1) Zaposleni mogu izdvajati sredstva za podsticaje u zapošljavanju putem platne liste ili ih uplaćivati direktno na račun iz člana 2. stav (2) ovog Uputstva.

(2) Druga pravna i fizička lica svoje donacije za podsticaje u zapošljavanju uplaćuju direktno na račun iz člana 2. stav (2) ovog Uputstva.

Član 5.

(Izjava o saglasnosti)

(1) Zaposleni koji žele putem platne liste izdvojiti sredstva za podsticaje u zapošljavanju, dat će svojim poslodavcima pisanu izjavu o saglasnosti za obustavu dijela neto mjesečne plaće i uplati obustavljenog iznosa na račun iz člana 2. stav (2) ovog Uputstva.

(2) U izjavi iz stava 1. ovog člana zaposleni će odrediti iznos ili procenat, kao i period u kojem će se obustava vršiti.

(3) Obrazac izjave iz stava (1) ovog člana je sastavni dio ovog Uputstva i može se preuzeti na zvaničnoj web stranici Vlade www.vladatk.kim.ba i na zvaničnoj web stranici Ministarstva www.mrptk.ba.

Član 6.

(Obaveza poslodavaca)

(1) Poslodavci su obavezni da u skladu sa izjavom iz člana 5. ovog Uputstva izvrše obustavu dijela mjesečne neto plaće i da obustavljena sredstva uplate na račun iz člana 2. stav (2) ovog Uputstva.

(2) U cilju realizacije obaveze iz stava (1) ovog člana, poslodavci su dužni Ministarstvu dostavljati specifikaciju obustavljenih iznosa po zaposlenicima, kod kojih je izvršena obustava dijela plaće na osnovu izjave iz člana 5. ovog Uputstva, u roku od 8 dana od dana isplate plaće.

Član 7.

(Evidencija prikupljenih sredstava)

(1) Radi transparentnosti, Ministarstvo će u elektronskoj formi uspostaviti i voditi Evidenciju prikupljenih sredstava za podsticaj novog zapošljavanja na području Tuzlanskog kantona, koja će biti objavljena na zvaničnoj web stranici Vlade www.vladatk.kim.ba i Ministarstva www.mrptk.ba

(2) Evidencija iz stava (1) ovog člana sadržavat će podatke o domaćim i stranim pravnim i fizičkim licima sa iznosom doniranih sredstava, osim za donatore koji izjave da žele ostati anonimni.

(3) Evidencija iz stava (1) ovog člana sadržavat će i podatke o iznosima odobrenih sredstava privrednim subjektima, po provedenom postupku JU Služba za zapošljavanje Tuzlanskog kantona (u daljem tekstu: Služba), a na osnovu dostavljenih podataka od strane Službe.

Član 8.
(Realizacija sredstava za podsticaje u zapošljavanju)

(1) Sredstva za podsticaje u zapošljavanju prikupljena na način propisan ovim Uputstvom će se doznačiti na račun Službe u skladu sa odlukom Ministarstva, koja će doznačena sredstva realizovati u skladu sa svojim aktima.

(2) O realizaciji sredstava iz stava (1) ovog člana Služba će kvartalno podnositi izvještaje Ministarstvu koje će ih dostavljati Vladi na razmatranje.

Član 9.
(Stupanje na snagu)

Ovo Uputstvo stupa na snagu danom donošenja, a objavit će se u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo razvoja i poduzetništva

MINISTRICA

Jelena Ilić

Broj: 14/1-02-15037/14
Tuzla, 20.06.2014. godine